

ORANJESTAD - UNOCA ta un fundacion cu ta stimula cultura di Aruba respaldando iniciativanan cu ta desaroya talento cultural y crea participacion activo den cultura na Aruba. Un di e plataformanan cultural den cual tin un interes grandi ta baile, pa e motibo aki UNOCA ta patrocina varios presentacionnan exitoso anualmente presenta pa diferente scol di baile local.

Kozlov Dance Academy, dirigi pa bailarin profesional, Leonid Kozlov, ta un di diferente academianan di baile local cu ta desaroya talento di nos muchanan. Tur aña e academia ta presenta nan "Student Showcase" den luna di Juni na unda studentenan ta presenta tur loke nan a siña y logra den e ultimo aña. E aña aki a conta un biaha mas cu apoyo di UNOCA pa haci e "Student Showcase" posibel.

Segun Mr. Kozlov, kende tin un trayectoria impresionante den e mundo di baile internacional, formando parti di e Bolshoi Ballet na Rusia y e New York City Ballet, na Aruba tin hopi talento y potencial cu por wordo desaroya. Ta comenta cu hopi mucha na Aruba a tin un don natural pa move y baila y si nan ricibi e atencion y training adecua por yega te na escenario internacional.

E showcase di estudiante a tuma luga diabierna 12 di Juni na Cas di Cultura. E show a presenta diferente baile, desde ballet clasico te na bailenan folklorico. Studentenan a train desde Februari y te cu 5 dia pa siman pa por presenta un show di calidad. Nan ta ansioso pa comparti nan talento y logronan cu e comunidad di Aruba. Durante e presentacion lo destaca e show di ballet Spaño cu yama Paquita y cu ta uno hopi anima, esaki lo muestra un nivel tecnico halto y un coreografia original cu ta data di aña 1881. E trahenan y e escenario pa Paquita a wordo specialmente diseña den e tayer di e Bolshoi Ballet na Moscow pa e produccion di e academia.

Pa mas informacion di e evento aki y otro eventonan cultural por bishita UNOCA ARUBA riba facebook. 

Bailarinnan di Academia di baile Kozlov ta presenta: "Student Showcase"

